

■ TRIBUNA POLITICA

La via per la refurma da la gulivaziun da finanzas è preparada da nov

DA BARBARA JANOM STEINER,
CUSSEGLIERA GUVERNATIVA

La consultaziun tar la refurma da la gulivaziun da finanzas è terminada. Fin il cumenzament d'avrigl 2013 è vegnidas inoltradas totalmain 147 posiziuns. Quellas èn vegnidas evaluadas. Sin basa dals resultats obtegnids ha la regenza tschernì ina nova via per la missiva al cussegl grond.

Ch'il basegn da refurmar la gulivaziun da finanzas vertenta è grond è incontestà. Las finamiras ed ils princips essenzials dal project da refurma chattan er in vast sustegn. La concepziun generala da la refurma constat. Percunter è vegnidas exprimidas grondas resalvas envers singuls elements dal project. Nus prendain fitg serius quellas resalvas ed adattain il project correspundentmain. Quai dovra in zic dapli temp che previs oriundamain. Perquai vegn la missiva da la regenza tractada dal cussegl grond pir en la sessiun da december 2013. La finamira da metter en vigur la refurma da la GF il 1. da schaner 2015 na vegn però betg midada. La refurma vegn curregida sco suonda:

– La refurma vegn a sa concentrar dal tuttafatg sin ils currents dals pajaments



tranter il chantun e las vischnancas. Las incumbensas existentas da las vischnancas e las structuradas na vegnan betg midadas.

– Las regiuns na vegnan betg pli tangadas da la refurma.

– La gulivaziun da finanzas vegn curregida uschia, ch'ella è supportabla er per vischnancas fermas, en spezial per las vischnancas turisticas.

– La gulivaziun da las grevzas vegn rinforzada ed optimada. Da quai duain profitar las vischnancas cun bleras fracziuns e cun abitadis sparpagliads.

– La scola populara resta ina incumbensa communabla ed il chantun na vegn betg a reducir ses engaschament finanziel vertent.

– Il chantun vegn a mantegnair ses engaschament

er tar ils fatgs da sustegn ed el na vegn betg a sa retrair da la tgira d'uffants cumplementara a la famiglia.

Cun questas correcturas cna faschain nus naginas reducziuns vi da las finamiras principalas e vi da la concepziun generala da la refurma. Ils singuls elements ston vegnir resguardads sco part dal nov sistem. Decisiva per ina vischnanca è la bilantscha generala e betg las singulas contribuiziuns. Nus vulain vischnancas fermas. Quai premetta ch'ellas adempleschan vinavant incumbensas impurtantas per il stadi e ch'ellas gidan a finanziar talas. Latiers tutgan en spezial la scolina, la scola populara, l'agid social ed ils servetschs forestals. Sch'il chantun distgargiass las vischnancas da questas incumbensas na daventassan ellas betg pli fermas, il cuntrari. Ellas perdessan clera-main lur impurtanza. E la finala vegn il chantun – per rinforzar las vischnancas – a stuaiv duvrar anc dapli meds finanziels per la gulivaziun da finanzas.

Jau sun persvadida che la via tschernida da nov per in project che vegn sustegnì d'ina maiorità è buna e che la refurma vegn uss a gartegiar. Las vischnancas meritan ina gulivaziun da finanzas gista e moderna.